

# 全宋詩輯補

湯華泉 輯撰

第十一冊

黃山書社

# 全宋詩輯補

全宋詩輯補

湯華泉

輯撰

第十一冊

黃山書社

## 釋澄鑒

釋澄鑒（一一三〇—一一三一），號愚叟，寧德（今屬福建）張氏子，初住建安白雲，後住福寧州支提山，薦福道燦禪師法嗣。

## 示寂書偈

八十二年，落賺世緣。躍翻筋斗，應迹西乾。《五燈會元續略》卷二上、《建州弘釋錄》卷二。

## 釋至明

釋至明（一一三〇—一一三五），號鐵鏡，福唐（今福建福清）王氏子，住湖州何山，遷明州大梅，徑山偃溪廣聞禪師法嗣。見《增集續傳燈錄》卷三、《五燈全書》卷五四。

偈

原野秋陰，寒螿悉吟。楓林落葉，片片赤心。達磨頂門無骨，兒孫海底摸針。忽然摸着時如何？誰道龍王宮殿深。

今朝八月二十五，記得洞山離查渡。落在雲門網子中，有屈至今無雪處。豎拂子雲門大師來也，合吃何山手中棒。且道過在什麼處？不合鼓弄人家男女。

臨終偈

絕羅籠，没回互。大海波澄，虛空獨露。《增集續傳燈錄》卷三。

釋鑿

釋鑿，號止泓，住四明天童，徑山偃溪廣聞禪師法嗣。見《增集續傳燈錄》卷三、《五燈會元續略》卷三。

## 偈

一有多種，二無兩般。枯桑知天風，海水知天寒。拄杖子聞與麼道？出身猶可易，脫體道應難。《增集續傳燈錄》卷三。

## 頌古

太陽玄問梁山：「如何是無相道場？」山指觀音曰：「這個是吳道子畫。」師擬進語，山急索曰：「這個是有相底，那個是無相底？」師有省，便禮拜。山曰：「何不道取一句？」師曰：「道即不辭，恐上紙筆。」山笑曰：「此語上碑去在。」

真空無相絕名模，立底精兮畫底粗。道即不辭難上紙，西天胡子沒髭鬚。《禪宗頌古聯珠通集》卷三七。

### 釋端信

釋端信，字孚叟，號正庵，永嘉（今浙江溫州）人，從一庵處躬，究天台止觀，住南湖。見《釋門正統》卷七。

### 臨終偈

生既恁麼，死也恁麼。雲散天一碧，日輪恰當午。《釋門正統》卷七。

### 釋鑒照

釋鑒照，律僧。見《釋門正統》卷七。

### 楊傑贊

道德仁義，教觀禪律。信手拈來，一源流出。彼上人者難可酬，其誰敢造毗耶室？《釋門正

統》卷七。

## 釋祖閻

祖閻（一二三四—一三〇八），號悅堂，南康（今江西星子）周氏子，先後住廬山東林、杭州靈隱，雙林智朋禪師法嗣。見《續傳燈錄》卷三六、《增集續傳燈錄》卷三。

## 訣衆偈

緣會而來，緣散而去。撞倒須彌，虛空獨露。《續傳燈錄》卷三六。

## 釋善來

釋善來，號石門，象山（今屬浙江）樊氏子，住四明天童，奉化雪竇，靈隱大川普濟禪師法嗣。見《增集續傳燈錄》卷三、《新續高僧傳》四集卷六一。

## 剪刀頌

渾鋼打就冷光浮，兩刃交鋒未肯休。直截當機爲人處，何曾動着一絲頭？《增集續傳燈錄》卷三。

古樵

一從斫倒岩前樹，幾見枯椿帶蘚斑。年去年來堪笑我，斧頭又被蛀蟲鑽。《禪宗雜毒海》卷七。

釋逸

釋逸，號雪溪，住圓通，天童辨山阡禪師法嗣。《增集續傳燈錄》卷三。

贊興化和尚偈

中原一寶有來由，拶得君王引幞頭。到此若無青白眼，當機誰敢謾輕酬？《增集續傳燈錄》卷三。

釋了萬

釋了萬，號一山，臨川（今江西撫州）金氏子，住温州江心，淨慈東叟仲穎禪師法嗣。見《增集續傳燈錄》

卷三。



## 上堂偈

靜(情情)「悄悄」，鬧浩浩。渾不涉階梯，已踏向上道。萬里無寸草，出門便是草。撞着賣柴翁，便是栽松老。琉璃殿上月團團，珊瑚枝頭日杲杲。《增集續傳燈錄》卷三。

## 釋鑒

釋鑒，號絕照，福州(今屬福建)人，初住里之乾元，後遷鼓山，嗣訥庵仁禪師。見《枯崖漫錄》卷中。

## 佛生日上堂

老鼠雖無三寸光，遍天遍地起災殃。命根落在乾元手，消得當頭一杓湯。《枯崖漫錄》卷中。

## 因浙歸者上堂偈

相別一何久，相逢祇舊時。眉毛分八字，鼻孔大頭垂。同上卷下。

## 釋益

釋益，號栢堂，温州（今屬浙江）人，出世婺之天寧，遷薦福，後主明之太平，升彰聖，至岳林，淨慈東叟仲穎禪師法嗣。見《增集續傳燈錄》卷三、《續指月錄》卷四。

## 山居詩

### 其一

千丈岩前倚杖藜，有爲須極到無爲。言如悖出青天滓，行不中修白壁疵。馬喻豈能窮萬物，羊亡徒自泣多歧。霞西道者眉如雪，月下敲門送紫芝。

### 其二

亂流盡處卜幽栖，獨樹爲橋過小溪。春雨桃開憶劉阮，晚山薇長夢夷齊。尋僧因到石梁北，待月忽思天柱西。借問昔賢成底事？十年騎馬聽朝雞。

### 其三

人間紅日易西斜，萬巧施爲總莫誇。剖出無瑕方是玉，畫成有足即非蛇。拳伸夜雨青林蕨，

心吐春風碧樹花。世念一毫融不盡，功名捷徑在烟霞。

其四

白雲影裏呵呵笑，地老天荒更不疑。樵徑有霜尋藥冷，石窗無月了經遲。青氈夜雪憐蘇武，黃犬西風嘆李斯。千古青編在天下，流芳遺臭更由誰？

其五

何事隨流又入流，麻衣松食我甘休。昔人有意成欵器，後世無因用直鈎。五斗折腰元亮仕，千鍾僭爵董權侯。尋常閱遍榮枯事，輸與空山枕石頭。

其六

人生不滿一百歲，今是昨非無定名。天下由來輕兩臂，世間何故重連城？龍亡大澤群鯁舞，兔盡平原走狗烹。滿目亂坡眠白石，有時特地憶初平。

其七

自知疏拙不可及，此字《元詩選》作「變」。土甃柴床住翠螿。此句《元詩選》作「深入寒雲千萬重」。夜火晴收楓塢葉，午茶寒煮石池冰。青林有雀安知鵠？碧海非鯤不化鵬。從此交游遠朝市，亂山截截路稜稜。此聯《元詩選》作「從此世人尋不到，亂山無路石稜稜」。

其八

自是不閑閑便得，矜功負勢總徒勞。乾坤不換蝸雙翼，泰華何殊牛一毛？  
揭石出潭秋水怒，捲茅落地晚風號。滿頭白髮千時政，謾說商山四皓高。

其九

千載繁華一彈指，區區朝暮欲何爲？黃金百鎰有時盡，白髮數莖無藥醫。  
蕉下謾誇尋死鹿，海中誰解接盲龜？西風一夜天如洗，人世南柯夢正痴。

其十

念念心心不得住，胡爲自抱百年憂？虛空有體需親證，定慧無門莫妄修。  
睡起碧天三丈日，詩成青樹一聲鳩。雙林大士分明說，會取橋流水不流。

其十一

與世不干諸境盡，更將何事入思量。觀河不改初年見，種菊唯期晚節香。  
烟此字《元詩選》作「春」。暖鹿眠三徑草，夜寒雁叫一天霜。憑誰說與貪痴客，荒隴枯骸曬夕陽。

其十二

亂山環碧不知重，此三字《元詩選》作「幾重重」。殘日晴霞映岳紅。  
此三字《元詩選》作「半映紅」。數此字

《元詩選》作「事」。有廢興秦失鹿，物無得喪楚亡弓。虛名萬事此二字《元詩選》作「終日」。雪填井，幻景百年繩繫風。轉憶天台舊游處，此三字《元詩選》作「松樹下」。倚松看瀑此四字《元詩選》作「倚看瀑布」。石橋東。

其十三

寥寥此道語何人，獨掩柴扉日又曛。六鑿未分誰擾擾？一爻纔動自紜紜。空林雨歇鳩呼婦，陰壑風寒虎嘯群。毀桀譽堯情未盡，有身贏得卧深雲。

其十四

一瓢飲澗碧雲涼，老桂吹香滿石房。未熟黃梁猶作夢，忽觀青鏡自生狂。八還有變千差起，六度無修萬法忘。閑拍長松發長嘆，戰爭三月火咸陽。

其十五

異草靈苗世莫栽，蘿龕禪起獨徘徊。岳僧近寫茶經去，海客遙尋藥塢來。曉洞雲腥龍孕子，夜天月冷兔懷胎。不知此二字《元詩選》作「事殊」。世異真風遠，武帝開池問劫灰。此句《元詩選》作「漢武開池見劫灰」。

其十六

千年明鏡忽生塵，逐妄迷真豈有因？海上刻舟求劍客，市中正此字《元詩選》作「當」。晝攬金人。萬牛難挽清風轉，兩曜偏催白髮新。此事知音古來少，碧天無際地無垠。

其十七

雪晴春色透籬門，碧嶂生寒翠竇昏。詩向靜中通造化，道從空外見根源。營營狡兔占三窟，逐逐蜣螂轉一丸。輸我此時都不會，半檐凍日見羲軒。

其十八

心心心已歇馳求，紙帳捲雲眠石樓。生死百年花上露，悟迷一旦鏡中頭。人言見道方修道，我笑騎牛又覓牛。舉足便超千聖去，百川昨夜轉西流。

其十九

溪隔紅塵樹鎖烟，寒蒲終日自安然。黃河定是有清日，曲木其如無直年。道在玄珠澄赤水，德亡神劍躍深淵。從來不結東林社，屋外開池自種蓮。

其二十

太古淳風久未回，滔滔末劫轉堪哀。素絲受色離蠶口，明月蒙塵出蚌胎。無病空花寧翳眼，

有疑弓影自沉杯。何人死得偷心盡，來共鋤雲伴種梅。

其二十一

節節梯雲入翠微，剪藤就樹縛茅茨。道存顏巷一瓢樂，力盡楚歌千古悲。平地起波方是險，連雲開棧未爲危。此生自許無他事，長與青山綠水期。

其二十二

古道何曾涉戰爭，目前蠻觸自相陵。醉人富貴九醞酒，縛世困窮三尺繩。失意徒悲烏繞樹，得時誰念鼠侵藤。何因平得世間路，萬別千差出愛憎。

其二十三

曦車一忽不容留，禍福無門是自求。理絕情忘金出井，塵空垢盡鏡涵秋。徒誇季子六朝印，謾說元龍百尺樓。滿屋黃金難買壽，青山壘壘葬公侯。

其二十四

無爲畢竟無爲也，畢竟無爲那處安？玉軸曉開先佛偈，翠微晴掃古仙壇。從他鑄印復銷印，任爾彈冠與掛冠。直入千峰萬峰去，人間謾說說路行難。

其二十五

閑看青天走白日，自來堪嘆不堪言。盜思高冢藏金瓮，鬼笑豪家限鐵門。漠北征夫秋飲馬，嶺南遷客夜聞猿。古今誰似寒山子，千偈能窮萬法源。

其二十六

利名忙不到雲林，白日自升還自沉。詩出杳冥空有象，道超玄妙合無心。棕鞋踏凍石梯滑，松帚掃霜山徑陰。別足燃臍總堪笑，一庵長掩亂雲深。

其二十七

山中久住無人識，百折烟痕老布袍。塵淨一盤珠湛湛，機生四海浪滔滔。春風金谷園何在？明月首陽山轉高。人世白駒飛過隙，可憐留核種蟠桃。

其二十八

殘山剩水占斜陽，休說秦王與漢王。易外無爻翻否泰，塵中有國繫興亡。秋風蓬島仙鄉遠，夜雪藍關客路長。古佛有言如皎月，照人煩惱作清涼。

其二十九

從他鹿角馬頭安，歷歷千年此道存。刑法措時應返樸，是非齊後自歸源。相韓卿趙棍中虱，



霸楚王吳檻外此字《元詩選》作「內」。猿。一句無私今古共，人間天上與誰論？

其三十

一念不生萬緣盡，楮裯茅席亦勝氈。采薇義士耻周粟，飲水聖人辭盜泉。自愛山中無雜事，誰言教外有單傳？古今岸谷幾遷變，華屋朱門保百年？

其三十一

鐵戟能浮羽楫沉，敗非成是迹休尋。謾言解返秦庭璧，須信難藏郢塢金。甜到盡時忘蜜味，酸從回處見梅心。青山若個不堪住，獨買沃洲支遁林。

其三十二

荒徑欹斜掛菡蓬，半籬紅粟倩溪春。山中有客見真虎，塵內何人識卧龍？此句《元詩選》作「世上何人識假龍」。秋竹走篔穿斷石，老藤行蔓上枯松。晚風斷送雲歸去，僧此字《元詩選》作「誰」。打原西寺裏鐘。

其三十三

我自將心與我安，從他迷悟不相干。養來木馬追風急，放去泥牛飲海乾。念起萬途皆有礙，理窮千聖透應難。紅爐焰上看飛雪，剎剎塵塵海岳寒。